

**Najib selamat sebagai PM tapi bukan sebagai presiden Umno, kata Zam**  
**The Malaysian Insider**  
**July 30, 2015**

Bekas Menteri Penerangan Tan Sri Zainuddin Maidin meramalkan Datuk Seri Najib Razak bakal berhadapan gelora dalam Umno susulan pemecatan Tan Sri Muhyiddin Yassin daripada jawatan timbalan perdana menteri.

Zainuddin yang dikenali sebagai Zam menyifatkan Najib "tersalah hitung" dalam tindakannya dan pilihan yang sedia ada sekarang adalah meneruskan langkah "autoritariannya".

"Penyingkiran Muhyiddin mungkin akan memanjangkan hayat kedudukan Najib sebagai perdana menteri tetapi beliau tidak akan dapat menyekat cabaran-cabaran besar yang akan dihadapi dari dalam parti akibat tindakannya yang tergesa-gesa.

"Tidak ada jalan lain lagi bagi Najib untuk menyelamatkan dirinya kecuali dengan menambahkan tindakan-tindakan yang bersifat authoritarian," tulis Zam di blognya, hari ini.

Kenyataan itu selari dengan kenyataan Zainuddin sebelum ini yang menggesa Najib bertindak memecat Muhyiddin daripada jawatan timbalan presiden Umno.

"Langkah pertama yang Najib akan ambil adalah pecat Muhyiddin daripada timbalan presiden Umno," kata Zainuddin kepada The Malaysian Insider.

Muhyiddin dipecat sebagai timbalan perdana menteri dan menteri pelajaran dalam rombakan Kabinet pada Selasa lalu, menyaksikan Najib menyingkirkan mereka yang mempersoalkan syarikat sarat hutang 1Malaysia Development Berhad (1MDB) secara terbuka.

Naib Presiden Umno Datuk Seri Mohd Shafie Apdal turut disingkirkan sebagai menteri.

Kedua-duanya masih mengekalkan kedudukan dalam parti, akan tetapi Muhyiddin sebagai timbalan presiden Umno boleh menggunakan perlembagaan parti untuk memanggil Perhimpunan Agung Khas sekiranya mahu terus mencabar Najib, kata Zainuddin. – 30 Julai, 2015.

Copyright © 2015 Edge Insider Sdn Bhd

Source:

<http://www.themalaysianinsider.com/bahasa/article/najib-selamat-sebagai-pm-tapi-bukan-sebagai-presiden-umno-kata-zam>